

陸川縣舊志序

謝錫侯

僕古燕之鄙人也嘗訪學秦楚聞見華岱九嶷之雄閱黃河洞庭之險巍巍浩浩著乎兩間嗟彼山河其乾坤留此以志不朽與因思古人之德業文章宏勲偉烈誠託史以傳之亦即巍巍浩浩著乎兩間不朽之山河也甲辰春僕膺 寵命領嚴訓來宰此邦戴星而出者還戴星而入非選事不敢有所要庸以抒夙昔耳未幾索所謂志從來吏攜手錄者數十頁蠹魚且飽其半矣陸雖小邑亦宜圖於版章垂有明三百年 興朝將百載將而志之一書無憑考求倘當時之未遑問焉耳奈之何哉爰詔邦之良士輯其散亡或旁求或昭著僉集其概重以典確有關世道人心者復為數冊雖不敢謂全豹畢陳亦既得見窺見一斑聖人曰十室之邑必有忠信又曰採風謀野不遺下里是役也閱兩載許矣向非勤而羅致將此地不同朱張湮沒而僅以名存也幾希請誌之謂誇既往以伐將來吁鄙人不忍為此態也雍正五年丁未夏五月

重修陸川縣志序

陸川之為縣山則天馬鳳凰文龍綵袍東震奎嶺之高且奇水則有烏龍妙垌崑崙六冷火甲伏波之深且長土腴可耕民樸可教景幽氣淑可遊可歌介兩粵高鬱二郡之間左北右白面化枕石地踰方百里雖未可云通都大邑若以置齊晉吳楚則亦輿區善國也隋始立邑旋省唐復置迄宋元明不改不虛於

皇朝總古今隸屬凡幾易交越容梧鬱陸之四封如故蓋粵縣得名自古者矣縣古則事積事積則籍多緬千餘年中地脉盛衰人為得失繩貫絲聯可也觀指知歸可也顧竟不盡然豈非積而隨佚事曷稽多而無統籍皆去乎夫朝家載籍如元和郡國大平寰宇元豐九域寰宇通志諸書非不周徧浩博然繪荒服一隅於王會之圖形不得不渺紀不得不畧且其行遠而傳久勢不得不難今之志郡邑者所據以立幹惟行省通志而已揆通志之始必下郡邑履徵故職詳而上之舉要而書之方其上也居然有郡邑志焉合衆志為一志範鑄精簡通志之體也奈何即曩時所上既經範鑄者復依約敷衍散一志為衆志有是體乎是其病也由履常之不預臨文之不暇傳舍

視官濠廬視地胥鈔視志乘期會視纂輯雖歲增月新無當於紀實

垂後矧以為緩而置之哉我

朝鼎建百年以來今陸數十輩有志創述者前惟方後惟謝僅有崖畧未見成書乙亥冬石侯近野攝陸篆慨然以復古新化修廢舉墜為心所行必規其要所志必觀其成修志特一事而尋繁領雜務信棄奇繁綱領明義例秉筆荷擔半載就厥緒而石侯以賢能移繁泉矣猶亟亟以開雕為已任前無需後無諉何政之不成然非私厚於陸也石侯余年家丈人行今秦中十稔屢當大邑一以此心成政陸之志適有藉焉夫邑立於千年以前志創於千年以後嗚呼非偶然也予故畧溯緣始而樂為之序繼石侯者同里張侯可亭予弟右榭

同年生也通洽英敏實成石侯之願者云

乾隆二十一年秋八月乙巳日

賜進士出身朝議大夫提督廣西學政翰林院編修加五級南海許道基序

重修陸川縣志序

陸川為鬱屬故巖邑也其舊志殘燬已無可考今所存者惟前令謝君數帖而已乙亥冬西蜀石君來攝是篆邑石君名孝廉居官有聲甫下車地方諸務一切次第舉行縣志其一也夫志之雖作也其所載者固不出乎一邑之中而其義例體裁雅而義例明固已斐然可觀矣方且勒成一書登諸梨棗深喜用志之精勤而赴功之迅速也

於志之成樂得為之序

乾隆二十一年歲次丙子

賜進士出身奉直大夫知廣西直隸鬱林州事前工部營繕清吏司

主事俞成序

重修陸川縣志序

國家定制疆域為都為省以至郡邑又各籍其境內山川風物文獻科條諸所因革使輯為一書命之曰志所從來久矣夫郡邑之志即古列國之史也體國經野觀風範俗稽古實於當年回醞風於還古其關於治術亦綦重矣我國家加意右文既集儒臣纂修實錄以成信史復

六
勅外省郡邑修輯志搜括遺賢蓋欲使遐陬僻壤無遠弗届可按籍而考披圖而悉以崇車書一統之大觀也乙亥冬崇先攝篆陸川洵所謂縣志舊板已燬僅得謝重修抄本殘闕無稽爰集紳士大夫計為重輯眾歡躍從事第崇先以簿書未吏愧乏三長敢以管窺之見肩筆削之任乎但既撫其疆域而不辨其廣袤治其人民而不知其風俗亦重負

朝廷簡任之意與各憲期望之心爰偕邑文學輩廣為搜採疑者闕之信者傳之稟請州憲俞公總裁參酌考訂潤色成此編仰副聖天子考古究今纖悉無遺之盛意云爾是為序

乾隆二十一年丙子夏仲署廣西直隸鬱林州陸川縣事潯州府貴縣知縣西蜀石崇先撰

凡例

一舊志自康熙五年方公鼎始編志畧而考核未詳發梓迨雍正五年謝公錫侯梧州府誌證之粗有端緒亦簡畧越今三十年凡前所未編後所應補者採之紳士里老一一載入

一是志列綱十八每綱小序弁其首以撮其要而綱目以類相從庶綱舉目張使閱者一目了然

一星野氣候各說互異而玉林州四屬相同今準以州志並廣西通志相較以取畫一

一沿革置前志多有舛錯今核之省志以及通志訛者正之

一官紳臧否難逃輿論志中有褒無貶竊附善善從長之意至現任與生存者總有德政功業概俟後來此時例不得書

一節烈已經奉 旌者註明年分列之於前其已合例而未奉旌者附之於後以示風勵

一選舉志內援例一途監生多不勝書惟捐貢捐職載入且錄優行以端士品列耆壽以重引年

一藝文舊志所載俱經前輩參酌概不敢棄至新增者不惟名顯文工惟其闕政事風化與夫山川形勝之篇錄之餘不載